

26. april

"Naalakkersuisut sermimik imermillu avammut nioqquteqalernissamut pilersaarussiaat pillugu nassuiaat 2004-imersoq"-mut malinnaatitsissummik nassuiaammik kingusinnerpaamik UKA2017-imi saqqummiusseqqullugit Naalakkersuisut peqquneqarnissaannik Inatsisartut aaliangiiffisassaattut siunnersuut.

(Nalunaarusiarineqartussap takussutississavai siunissami imermik sermimillu nunanut allanut nioqqutissiortalernissamut aporfiusinnaasut aammalu nunarsuarmioqatigiit niuerfissuini niuernerpalaartumik unamminarsinnaasut nalunaarsussallugit. Nalunaarusiap aamma ersersissavaa sermimik imermillu avammut niueruteqarnissamut avungangaaq pilersaarussiaq, imermik avammut niueruteqarnermi maannamut misilittagaalersimasut aallaavigalugit).

(Inatsisartunut ilaasortaq Jess Svane, Siumut)

Siullermik Jess Svane, qujanaq aalajangiiffissatut siunnersuummut pisariaqartumut oqaluuserisassanngortitsininnut. Siumumiit nuannaarutigarpur nunarsuatsinni nunatsinnilumi imeq pisariaqartinneqartup annerusumik atorluaanikkut nunatsinnut iluaqusiiffiusumik ingerlatsiviunissaa siunertaralugu suliniuteqarnissamik alloriaqqittoqartariaqarnera ugartorneqarmat.

Siumumiit pingaartipparput Kalaallit Nunaanni sermeq imerlu pillugit paasissutissat tunngaviusariaqartut ullutsinnut naapertuutut pigalugit niuernerpalaartumik ingerlatsisoqarnissaa ugartortuartaqarigut.

Imeq Sermerlu tunisassiarineqarnissaanik ugartuinerit ukiorpassuanngortuni ingerlanneqarput, aammalumi misissuinerit misissueqqissaarnerillu ingerlaavartumik qinnuteqaatigineqartarlutik, taamaattorli arajutsisimannigilarput nunatsinni nammineq tunisassiat mamarluinnartut pitsaasutsimikkullu ajukkunnangitsut pilersinneqartartut avataanniit eqqussukkanik annertuumik unammillerteqartarmata, taamaattumik nunatsinni nammineq pilersorneq illersussagatsigu annerusumik tamanna ilanngullugu isumaliutigineqartariaqarpoq.

Ass. Qeqertarsuarmi tunisassiarineqarnikuusoq imeq "938 Greenland Spring Water" nunatsinni mamarineqarluarluni pitsaasumik siammarterneqarnikuuvoq, taamaattorli pinngortitami patsiseqartumik kingorna tunisassiarinera unippoq.

Naalakkersuisut siorna 2015-mi § 37 atorlugu apeqqummut akissuteqarnerminni ilisimatitsissutigaa Ingerlatseqatigiiffiup nalunaarutigisimagaa Iermik "938"-imik tuniniaanerup aallarteqqinneqarnissaanik sulinerit ingerlasut, aamma suliffissat pisariaqaqisut qaammatini 7-8-ini inuit 5-8-it atorfinitsinneqassasut naatsorsuutigineqartut taamaattumik iluatsillugu paaserusussavarput akuersissut 2028 tikillugu atuuttussanngortinneqartup maanna killiffimmi tunisassiornissamut avammullu tuniniaanissamut akuersissut siunertaasut qulaani taaneqartut malitsinneqarneri sumut qanorlu killissimanersut?

Pingaaruteqarpoq tunisassiornissamik piginnaatitsissutit ukiorpassuarni akuersissutitalerlugit tunniunneqartartut nunatsinnut iluaqusiisinaanermik ingerlatsiviunissaat qulakkeersimaniarlugu nunaqavissut sallsaatillugit inissisimatinneqartariaqartut aammalu tunisassiornissamik tunineqartut arlaatigut patsiseqartumik nunatsinnut iluaqusiiffiunatik ingerlatsilerpata akuersissutit

utertinneqarsinnaaneri periarfissatut allassimalernissaat ilanngullugit misissorneqartariaqartoq, taamaaliornikkut tunisassiortut soqutigiuaassavaat nunatsinniit pisussuutit tigusat nunatsinnut niuernermik ilalerlugit utertitsiffiusinnaanissaat.

Nunarsuatsinni imeq tunisassiaralugu iluatsilluartumik niuerutigineqarpoq, tamannalumi annikilliarungitsumik pisariaqartinneqarpoq. Nunarsuarmioqatitta inuiaat imermik mamarluartumik pitsaassutsimigut qaffasissumik inissisimasumik misiliinissaanik periarfissarsiortuartariaqarpugut, taamaasilluni nunarput nunarsuup sinneranut niuernikkut pisariaqartinneqartumilu kivitseqataalluni ingerlatseqataalersinnaassaaq.

Siumumiit nuannaarutigaarput Naalakkersuisut maanna tunisassianut unammilligassanut annerusumillu tunisassiornissamut assartuinnermut aningaasartuutit ilanngullugit samminiarmatigit, tamanna pisariaqarpoq soorlutaaq siunnersuuteqartup Jess Svane, Siumut tamanna ujartoraa.

Nunatsinni inuit ikittuunerput nunarujussuarmilu siammasissumik inoqarfiit siaarsimaneri patsisaallutik imaaliallaannaq tunisassiornerit iluatsittanngimmata paasisutissat misilittakkallu tamarmik atorfissaqartinneqartarput taamaasilluni ajornartorsiutaasartut uteqqiasumik ingerlanneqarsinnaajunnaarlugit qularnaariniartoqarsinnaammat.

Periarfissat aporfïllu piusartut ersarissumik takussutissaqalernissaanik ujartuineq Siumumiit taperserlugu matumuuna nalunaarutigissavarput.

Suka K. Frederiksen

Siumut